

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi

1 ¹Xanë Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. ²Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxuto-tsoniataenexa jamatabëcuenexanepanaeya panejinavanapaenexa.

Pacuenia Dioso naneconitsiaexanaena pibisiacune pexanaevi pamatacabi Cristo icatsia patsianica yabara pelivaisi

³Tajamonae, panevajënaeyabelia bitso orijibia panajamatabëcuene-copataponame Diosojavabelia. Pacaenëmë canacujitsia namataenetsia panaasivamënu tsavanapae. Bajaraxuata dexitamatacabi paxamë yabara pajumaitsinë tsane Diosojavabelia: “Xanepana rabaja. Pexaniacuenia yavenonaponame Tesalónica tomarapijivi,” pajanë tsane. ⁴Diosojavabelia pajamatabëcuenesaëmë tsaponae itsamonae pinijicuenia pacabijataeya-biabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatamaranëjava, Dioso pejumecovënë-tsivijava. ⁵Bajarapacuenia pacabejiobiaexanabiabi ata, Diosojavabelia paneajamatabëcuenesaë tsaponaexae, nayapëtane Dioso papecajamatabëcueneyavenonaejavanexa pamatacabi naneconitsiaexanaena pijane-coni pexainaevi. Bajarapamatacabi Dioso papecasivajamatabëcueneba-rëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

⁶Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamona pacabejiobiaexanapona maparucaeje. ⁷Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacunevecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëängelevi yajava, pitarunutsicotia ata yajava. ⁸Jesús jane baja patsianica penaneconitsiaexanaenexa pamona apo yapëtae Dioso. Pamona ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. ⁹Bajarapamona pijaneconi yabara Jesús naneconitsiaexanaenatsi dexitamatacabijavabelianexa. Dioso pitabaravecu tajë xuabianatsi. Bajarapamona Dioso pijapenivenivenaecotia apo tae tsane caeto ata. ¹⁰Pamatacabi vajatuxanenë icatsia patsianica, pinijicuenia pijajivi yaiyataenatsi. Pinijicuenia sivajamatabëcuene nabenajacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaemë patacatsipaebilivaisi.

¹¹Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa. Pacatovajëtabiabatsinua Diosojavabelia pecaëjëpaejamatabëcuenetatsi papecajamatabëcuene yavenonaenexa, paneexanaenexa daxita pacuenia pajamatabëexanapona. Pacatovajëtabiabatsinua Diosojavabelia papecayavenonaponaenexa daxita pacuene paexaname Jesucristo papijajivixaemë. ¹²Nexata paxamë xaniavaetsia panejinavanapaejamatabëcueneta, vajatuxanenë Jesucristo dexitajivi yaiyataenatsi. Paxamë ata juya Dioso pacayaiyatae yaexanaena dexitajivi. Bajarapacuenia pacayaiyatae yaexanaena papecaitaxutotsoniataexae vajaDioso, vajatuxanenë Jesucristo ata.

Pibisiacuene bitso pexanabiabinë yabara pelivaisi

2 ¹Tajamona, pacatsipaebatsi baja cajena paneyapëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavabelia pamatacabi patsianica. ²Nexata pajivi najumetsënëtsiaya pacajumai tsane: “Espíritu Santo raja neyapëtae yaexana. Jesucristo rabaja patsica,” pacajai tsane, pëtsa pajumecovënëta. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëta. Pajivi pijinia najumetsënëtsiaya pacajumai tsane: “Pabloana raja nacamatoyaquina: ‘Jesucristo rabaja patsica,’ jai raja vajanacamatoyaquinaebaxutota,” pacajai tsane, pëtsa pajumecovënëta. Itsamona najumetsënëtsia itsa pacatsipaeba Jesús pepatsijavatsica yabara, pëtsa panajamatabëcueneepatajërërecame panejumecovënëta vanapae livaisivecu.

Pëtsa pajamatabëcuenenabenajacamenua. ³Pëtsa pajumecovënètame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponanexa daxitamatacabijavabelianexa. ⁴Bajaraponë cuenitoya tsane Dioso pijacuene. Pamonaë ata vajëcabiaba bedioso petaevijavabelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonënë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënètame tsabaja bajara-palivaisi? ⁶Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniva. Dioso petocaëjëtsimatacabita bajaraponë patsiana. ⁷Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinexa. ⁸Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanënë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaëcotiata. ⁹Bajaraponë patsiana dovathi pejamatabëcueneta pibisiacuen bitso pexanabiabinexa. Nexata bajaraponë dovathi pesaëta pinijicuene pexanaejava exanaponaena jivi peyamaxëitojorobinexa, beayaijamatabëcuenenë petaenexatsi. ¹⁰Bajaraponë exanaena daxita xua pibisiacuenë, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniaajilivaisi pecapanepaelivaisinexatsi Diosojavabelia. ¹¹Bajaraxuata Dioso tocopatsiana bajaraponë penajumetsënëtsilivaisi petsipaëbinexatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. ¹²Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniaajilivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espíritu Santo pesaëta

pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴Dioso paneitoroba patacatsipaebine-xa pexanialivaisi papecacapanepaelivaisinexa Diosojavabelia. Nexata baja pajumecovënëtame bajarapalivaisi. Bajarapacuenia Dioso pacajunata pane-patsinexa vajatuxanenë Jesucristojavabetsia, papecayajavaponaponaenexa.

¹⁵Tajamonae, bajaraxuata panevajënaeyabelia pacaasaëmëre tsavapae panejumecovënëtsijava Dioso. Pajumecovënëtanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtame. ¹⁶Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsioniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebine-xa pexanialivaisi. Pacatovajëtatsinua paneexanaenexa daxita xua pexaniacuene.

Pacuenia Pablo toyaquina Dioso pejumecovënëtsivi:

“Panetovajëre Diosojavabelia,” pejailivaisi yabara pelivaisi

3 ¹Tajamonae, pecopiarucelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjē-paenexa daxitanacuajava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtame bajarapalivaisi. Patovajërenua daxitajivi peyaiyataenexa Dioso pejumelivaisi. ²Panetovajërenua Dioso patanevetsinexa pibisiajamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. ³Itsiaata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. ⁴Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. ⁵Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavana-paenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶Tajamonae, vajatuxanenë Jesucristo pejamatabëcueneta pacaito-robatsi. Dioso pejumecovënëtsivi ata itsa piafaetabivi, bajarapamonae



Tasalónicatomara (2Te 3.18)

panavecuatsare. Bajarapamonae apo nacuenebabiabi penaevetsinexa pacuenia picani paitorobajë. ⁷Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. ⁸Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejeyanivatsi patanevetsijava patanajinavanapaejavata. ⁹Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. ¹⁰Pamatacabi abaxë panajinavanapajë paxamëjavata, pacajumaitsitsi baja cajena: “Pajivi afaetabi, pëtsa naxane,” pacajaitsi baja cajena. ¹¹Pavënëliv aisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. ¹²Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina pane-naevetsinexa,’ jai raja Pablo,” pajamë tsane.

¹³Tajamonae, pëtsa pajamatabëcuenecueraname pexaniacuene panee-xanavanapaejava. ¹⁴Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebija yabara. ¹⁵Itsiata baitsi jane bajarapajivi

bepanijavajabitsaējivi pētsa pataneme. Dioso panenajuajumecovēnētsivixae, pexaniajamatabēcuenia pamuxujiobianame.

**Pacuenia Pablo toyaquina peveretsinexa baja
petoyaquinaelivaisi mapabaxutotaje yabara pelivaisi**

¹⁶Vajatuxanenē vajanacajamatabēcuenē xanepanaeyaexanaenē. Pacatovajētatsi bajaraponējavabelia daxitamatacabi papecajamatabēcuenē xanepanaeyaexanaenexa, itsamonae pacaitsacueniababiabi ata. Pacatovajētatsi vajatuxanenē papecayajavaponaponabiabinexa.

¹⁷Xanē Pablonē, tacobeta pacatoyaquinatsi mapalivaisiyoje patacajamatabēnājinaexae. Paitanecuenia yaquinabiabajā daxita tayaquinaebaxutonēta, bajarapaitanecuenia pacatoyaquinatsi mapalivaisiyoje paneyapētaenexa xanē patacatoitorobicuene mapabaxutoje. ¹⁸Pcatovajētabiabats i Diosojavabelia daxita paxamē vajatuxanenē Jesucristo papecayavenonabiabinexa.